

Descubrimiento di America y Caribe y nombernan di Aruba

Riba continente di America y islanan di Caribe, tabatin civilizacionnan prome cu 12 di oktober 1492, ora cu Columbus a descubri e continente pa e Europeanonan.

Den Caribe tabatin e famia linguistica macro Arawak of Arahua y e famia linguistica macro Caribe. Tur dos troncon ta reparti den diferente categoria di grupo y tin di nan complica. Ta importante pa sa, cu e grupo di: indjan Taíno y Caquetío entre otro, ta sali di e troncon di lenga Arawak.

Di e famia macro linguistica Caribe nos a scucha mas tanto di e "Caribenan" y no di otro grupo specifico. E Taínonan ta nabegante y nan conoce e region di Caribe y parti di continente di America. E Taínonan a duna e isla e nomber di "Arubeira". E Caquetíonan a yama e isla "Oibubai", cu ta nifica "isla guia" y "Oruba", cu ta nifica "isla bon situa".

E Caribenan a yama e isla "Ora Oubao", cu ta nifica "isla di cocolishi" y "Oirubae", cu ta nifica "e compañe di Curaçao". Pa e Caquetíonan, "Oruba" no tabatin relacion cu "oro".

Columbus a descubri Guanahani (isla San Salvador) na 1492. Esaki ta su entrada den continente di America. Na 1499 Alonso de Ojeda y Amerigo Vesputio a descubri e islanan. Un di nan ta keda 10 miya di distancia di unda ta construi e casnan manera esnan na Venecia. Mayoria di e matanan riba e isla ta "palo di Brasil" y e hendenan cu ta biba riba e isla ta di statura halto.

Probablemente, e nativonan cu a guia e Spañonan a duna nan e informacion. Pues, na 1499 Aruba a bira conoci pa e Spañonan y a bira colonia di Spaña. Den e tempo ey, e Caquetíonan tabata riba Aruba.

Na Aruba, e hefe di e indjannan tabata Simas

y e a ricibi e sacerdotenan Spaño cu hopi amabilidad. Nan a regala Simas, un "Cruz di palo".

Na november di 1529, pa medio di un Cédula Real, a otorga Juan Martínez de Ampués, e derecho pa repobla "islanan inutil" di: "Oruba", "Curacao" y "Buen Ayre". E nomber oficial di e Spañonan pa Aruba tawata: "isla de Oruba". Nan a sigui cu e nomber di e indjannan Caquetío.

Antonio Salcedo ta indica na 1788 den "Diccionario geográfico-histórico de las Indias Occidentales": "Oruba", isla pequeña de la mar N en el Golfo Triste cerca de la costa de la Provincia y Gobierno de Venezuela y Nuevo Reyno de Granada, entre la de Curazao á Levante, y los Monjes á Poniente: esta poblada de los Holandeses que la han cultivado, en 36. gr. 40. min. de long., y a 12. gr. 20 min. de lat. bor. "Orubilla", otra

isleta pequeña de la mar del N. al O. de la anterior. Den "The New Practical Navigator" di John Hamilton Moore, tin den "Table XXVIII of Latitudes and Longitudes": "Oruba" isle, E. end Lat. D.M.S. 12 28 30 Long. D.M. 70 ..4. "Orubilla": Lat. D.M.S. 12 37 0 Long. D.M. 70 35. Riba mapa tambe por mira "Oruba" y "Orubilla". Actualmente, "Orubilla" no ta situa na e luga indica.

Di 1568 te cu 1648, "Republiek der Zeven Verenigde Nederlanden" (Hulanda) tawata den guerra cu Spaña. Na 1621 e Republiek a fundar de: "Geoctroyeerde West-Indische Compagnie., (WIC). E prome isla cu WIC a conquista di Spaña

tabata Curaçao na 1634.

Hulanda tabata busca un basis pa comercio y pa pirateria den tempo di guerra, y Curaçao a bira e basis. Pa Hulanda, e situacion di Curaçao tabata atractivo, y no si tin oro of no. Pa Hulanda e islanan ABC no tabata "inutil" nan tabatin un funcion.

Na 1648, e guerra cu Spaña a caba y a firma e tratado di Paz di West-fallen. Den e tratado entre Spaña y Hulanda, Hulanda a haya independencia di Spaña y Hulanda a haya e islanan. Dia 30 di januari 1648 a firma e tratado y di 1648 te cu awor, e nomber oficial a bira: "ARUBA".

Relato skirbi pa Celia O. Thiel, socióloga